

SUD BOSNE I HERCEGOVINE



СУД БОСНЕ И ХЕРЦЕГОВИНЕ 10

x. K/08/516-2

7

(St. Gm.)

1358

13-11-2008

Broj: X-K-08/516-2

Sarajevo, 16.12.2008. godine

U IME BOSNE I HERCEGOVINE

Sud Bosne i Hercegovine, u vijeću sastavljenom od sudije Miso Salema kao predsjednika vijeća, te sudije Ševke Šahbegovića i sudije Fikreta Kršlakovića kao članova vijeća, uz sudjelovanje pravnog savjetnika Denisa Podžića kao zapisničara, u krivičnom predmetu protiv optuženog Damira Hadžikadunića, zbog krivičnog djela organizirani kriminal iz člana 250. stav 2. Krivičnog zakona Bosne i Hercegovine (KZ BiH), u vezi sa produženim krivičnim djelom krijumčarenje osoba iz člana 189. stav 1. u vezi sa članom 54. KZ BiH, povodom optužnice Tužilaštva Bosne i Hercegovine (BiH) – Posebni odjel za organizovani kriminal, privredni kriminal i korupciju, broj: KT-158/08 od 12.06.2008. godine, nakon održanog glavnog, usmenog i javnog pretresa povodom Sporazuma o priznanju krivnje, u prisustvu tužioca Tužilaštva BiH Diane Kajmaković, optuženog Damira Hadžikadunića i njegovog branioca, advokata Boriše Ilića, donio je i javno objavio dana 16.12.2008. godine sljedeću:

PRESUDA

Optuženi: DAMIR HADŽIKADUNIĆ, zvan "Bijeli ili Umproforac", sin Samila i majke Nize, rođene Makarović, rođen 25.04.1975. godine u Doboju, po narodnosti Bošnjak, državljanin BiH, po zanimanju ugostitelj, završena SSS, oženjen, otac petoro djece, lošeg imovnog stanja, u CIPS-u prijavljen na adresi Matuzići bb, opština Doboj Jug kod Aličić Amira, boravi na adresi Martinovići bb, opština Teslić kod Redžić Hamdije.

KRIVJE

Što je:

Zajedno sa dvije izvjesne osobe, a u društvu sa osobom po imenu Hasib i licima po imenu Pero i Kazimir državljanima Republike Hrvatske, u toku 2007. godine i januara 2008. godine, radi pribavljanja imovinske koristi – iz koristoljublja, protivno Konvenciji ujedinjenih naroda protiv transnacionalnog organizovanog kriminala, protivno članu 6. Protokola protiv krijumčarenja imigranata kopnenim, morskim i vazdušnim putem i protivno propisu člana 10. i propisima drugih članova Zakona o kretanju i boravku stranaca i azilu („Službeni glasnik BiH“ br. 29/03 i 04/04), pripremali i organizovali prebacivanje drugih osoba – migranata iz Republike Srbije u druge države, čiji migranti nisu državljanini niti stalni stanovnici, bez ispunjavanja propisanih uslova za zakonit ulazak i boravak migranata u drugim

državama, a sa ciljem osiguranja ulaska istih u druge države, tako da su se optuženi Damir Hadžikadunić zajedno sa dvije izvjesne osobe, u društvu sa osobom po imenu Hasib međusobno dogovorili, a potom i sa njima poznatim licima po imenu Jasmin Mahmutović, Musić Mirza i Delić Mirza zajedničkim djelovanjem uz novčanu naknadu učestvovali u pripremanju i organizovanju prebacivanja migranata preko teritorija Bosne i Hercegovine u druge države, pa su tako, na temelju opisanih dogovora optuženi Damir Hadžikadunić zajedno sa dvije izvjesne osobe, a u društvu sa osobom po imenu Hasib u smislu člana 1. stav 18. i 19. KZ BiH kao pripadnici organizovane grupe ljudi koja je organizovana sa ciljem pripremanja i prebacivanja migranata preko BiH u druge države, svi zajedno zajedničkim djelovanjem u toku septembra i oktobra 2007. godine, te januara 2008. godine organizovali prebacivanje više migranata iz Republike Srbije, Turske i Albanije u druge države na način:

I

Nakon što je izvjesna osoba u društvu sa osobom po imenu Hasib organizovala prebacivanje pet državljana Republike Srbije Albanske nacionalnosti porijeklom sa Kosova iz Srbije na teritorij BiH, a potom dalje u R Hrvatsku, nakon čega su sa ciljem daljeg prebacivanja ovih lica u zemlje EU, krajem septembra 2007. godine angažovali njima poznato lice po imenu Jasmin Mahmutović da izvrši prijevoz ovih pet lica iz Zagreba (RH) do mjesta Buje u Istri (RH), dana 29.10.2007. godine, izvjesna osoba mobilnim telefonom pozvala Jasmina Mahmutovića i ponudila mu da izvrši prijevoz ovih lica do mjesta Buje u Istri (RH), na šta je Jasmin Mahmutović pristao, te je u dogovoreno vrijeme došao u Zagreb u naselje Dubrava kod obdaništa gdje je od Hadžikadunić Damira koji je svojim vozilom marke „Santana“, boje bijele kafe dovezao navedena lica, preuzeo mlđb. Veseli Artona, mlđb. Ruzdi Halima, Deltin Pashaja, Kingji Vilsona i Leare Pashaja, a potom trojicu ovih lica smjestio u unutrašnjost vozila, a dvojicu u prtljažnik, pmv vozila marke „Mercedes“ bijele boje, registarskih oznaka 968-K-400, nakon čega je krenuo u pravcu mjesta Buje, odnosno mjesta gdje je i ranije dolazio prema uputama koje je dobijao od osobe po imenu Hasib, a nakon toga krenuo sa navedenim licima kroz vinograde kako bi ih doveo do mjesta gdje ih je trebala preuzeti izvjesna osoba, nakon čega su opaženi od strane policije Republike Hrvatske koje su lišili slobode navedenih pet lica, a lice po imenu Jasmin Mahmutović je uspjelo pobjeći, a prethodno je za navedeni prijevoz putem Western Uniona od izvjesne osobe dobio iznos od 4.950 kuna koji je podigao u pošti u Zadru;

II

U mjesecu decembru 2007. godine dogovorio sa više osoba iz Republike Hrvatske i Bosne i Hercegovine da će učestvovati u ilegalnom prebacivanju državljana Turske, Albanije i Srbije preko teritorije BiH i to na način da će za određenu novčanu nadoknadu ovim licima nakon što budu ilegalno prevedeni na teritoriju R. Hrvatske

osiguravati smještaj u Zagrebu u ulici Zelenički put br. 10 u kući vlasništvo Glavaš Jure i potom ih po daljnjim uputama i dogovorima sa naprijed navedenim licima prevoziti dalje prema R. Sloveniji i drugim zemljama Evropske unije, tako da je:

1. U vremenskom periodu od 08. do 10.12.2007. godine Hadžikadunić Damir, a sa ciljem pribavljanja protivpravne imovinske koristi, dogovorio sa licima po imenu Pero i Kazimir državljanima R. Hrvatske da će izvršiti ilegalno prevođenje više osoba turske i albanske narodnosti iz Republike Srbije u Republiku Hrvatsku i to na način da je u Zagrebu u kući na adresi Zelenički put br. 10, vlasništvo Glavaš Jure primio i osigurao smještaj za jedanaest osoba koja su prethodno lica Pero i Kazimir uz pomoć drugih lica iz Republike Srbije uspjeli prevesti na teritoriju R. Hrvatske i kojom prilikom je Hadžikadunić Damir za ovu uslugu, odnosno smještaj navedenih lica naplatio 220,00 Eura.
2. Nakon što su dana 16.12.2007. godine preko državne granice između Republike Hrvatske i BiH preko željezničkog mosta između mjesta Gunja (RH) i Brčko (BiH) izvan redovnog graničnog prelaza lica po imenu Pero, Kazimir i Ivan državljani Republike Hrvatske zajedno sa licima Ekrem i Kemal državljanima BiH uspjeli prevesti dvije osobe albanske nacionalnosti, Hadžikadunić Damir a sa ciljem pribavljanja protivpravne imovinske koristi, u Zagrebu u ulici Zelenički put 10 u kući vlasništvo Jure Glavaša izvršio prihvrat navedenih lica nakon što su mu ista dovezena od strane N.N. osobe koju je prethodno angažovalo lice po imenu Ekrem, a potom navedena lica krio na navedenoj adresi sve dok ista nisu u organizaciji gore navedene grupe lica prevedena na područje Republike Slovenije.

Dakle, iz koristoljublja kao pripadnik organizovane grupe ljudi koja je organizovana sa ciljem prebacivanja ilegalnih imigranata, učestvovao u ilegalnom prebacivanju ovih lica preko teritorije BiH u druge države i omogućio licima koja nisu državljani države primateljice niti u njoj imaju stalni boravak da ostanu na području te države.

Čime je počinio krivično djelo organizirani kriminal iz člana 250. stav 2. KZ BiH u vezi sa produženim krivičnim djelom krijumčarenje osoba iz člana 189. stav 1. u vezi sa članom 54. KZ BiH.

Na osnovu navedenog zakonskog propisa, uz primjenu odredaba člana 49., člana 51. stav 2. i člana 250. stav 5. KZ BiH u vezi sa članom 58. i članom 59. stav 1., 2., 3. i 4. KZ BiH, Sud optuženom izriče:

USLOVNU OSUDU

Kojom se optuženom Damiru Hadžikaduniću utvrđuje kazna zatvora u trajanju od 2 (dvije) godine te istovremeno određuje da se utvrđena kazna zatvora neće izvršiti

ako optuženi u roku od 5 (pet) godina od dana pravomoćnosti presude ne izvrši novo krivično djelo.

Na osnovu članova 110. stav 1. i 111. stav 1. KZ BiH, Sud od optuženog oduzima imovinsku korist pribavljenu krivičnim djelom u iznosu od 172.133,85 KM, a koja novčana sredstva je optuženi dobrovoljno platio na žiro račun Centralne banke BiH, Ministarstvo finansija i trezora, broj računa 0000030000000145, dana 21.04.2008. godine.

Na osnovu člana 56. KZ BiH optuženom se, u slučaju opoziva uslovne osude, u utvrđenu kaznu zatvora u trajanju od 2 (dvije) godine ima uračunati vrijeme provedeno u pritvoru, počev od dana 26.03.2008. godine do 13.06.2008. godine.

Na osnovu člana 188. stav 1. u vezi sa članom 186. stav 2. Zakona o krivičnom postupku Bosne i Hercegovine (ZKP BiH), optuženi Damir Hadžikadunić se obavezuje platiti troškove krivičnog postupka čiju će visinu Sud odrediti posebnim rješenjem nakon pribavljanja potrebnih podataka.

O b r a z l o ž e n j e

Tužilaštvo Bosne i Hercegovine je optužnicom broj: KT-158/08 od 12.06.2008. godine, potvrđenom dana 16.06.2008. godine, optužilo Damira Hadžikadunića za organizirani kriminal iz člana 250. stav 2. Krivičnog zakona Bosne i Hercegovine (KZ BiH), u vezi sa produženim krivičnim djelom krijumčarenje osoba iz člana 189. stav 1. KZ BiH.

Dana 26.11.2008. godine, optuženi Damir Hadžikadunić i njegov branilac, advokat Boriša Ilić, zaključili su sporazum o priznanju krivnje sa tužiocem Tužilaštva BiH, Dianom Kajmaković, te sporazum dostavili Sudu na razmatranje. Dana 28.11.2008. godine, dostavljen je i Anex sporazuma o priznanju krivnje u kojem je istaknuto da su optuženi Damir Hadžikadunić i njegov branilac saglasni da Sud, po slobodnoj ocjeni utvrdi visinu imovinske koristi pribavljene krivičnim djelom. Sud je, u skladu sa članom 231. ZKP BiH, razmotrio zaključeni sporazum o priznanju krivnje. Optuženi je sporazumom priznao krivnju za počinjeno krivično djelo organizirani kriminal iz člana 250. stav 2. KZ BiH u vezi sa krivičnim djelom krijumčarenje osoba iz člana 189. stav 1. KZ BiH, a koja djela mu se optužnicom stavljaju na teret. U sporazumu je predloženo da se optuženom, za počinjeno krivično djelo izrekne krivično pravna sankcija, uslovna osuda, i to tako što će se optuženom utvrditi kazna zatvora u trajanju od 2 (dvije) godine i istovremeno odrediti da se ista kazna zatvora neće izvršiti ako u roku od 5 (pet) godina optuženi ne učini novo krivično djelo. U sporazumu je, između ostalog, konstatovano da se optuženi Damir Hadžikadunić obavezuje svjedočiti o svim činjenicama koje su mu poznate u krivičnim predmetima krijumčarenja osoba i o svim izvršiocima, saizvršiocima i pomagačima tih djela koja su njemu poznata i u kojima je

eventualno i sam sudjelovao, kao i da je optuženi saglasan, ukoliko ga Sud ne oslobodi naknade troškova, da naknadi troškove krivičnog postupka koje Sud utvrdi. Tokom pretresa za razmatranje sporazuma o priznanju krivnje, Sud je utvrdio da je optuženi sklopio navedeni sporazum dobrovoljno, svjesno i sa razumijevanjem, a nakon što je upoznat sa mogućim posljedicama, uključujući i posljedice vezane za moguće imovinsko pravne zahtjeve i troškove krivičnog postupka. Sud je utvrdio i da postoji dovoljno dokaza o krivnji optuženog, kao i da je optuženi razumio da se na ovaj način odriče prava na suđenje i da ne može uložiti žalbu na krivičnopravnu sankciju koja će mu biti izrečena.

Tokom pretresa za izricanje krivičnopravne sankcije, održanog dana 15.12.2008. godine, a nakon što je optuženi prethodno ispunio sve svoje obaveze naznačene u sporazumu, odnosno nakon što je Sud prihvatio predmetni sporazum, tužilac Tužilaštva BiH je istakao kako je Tužilaštvo, prilikom predlaganja krivičnopravne sankcije navedene u sporazumu, u obzir uzelo držanje optuženog tokom pretresa, njegovu pomoć u rasvjetljavanju predmetnih krivičnih djela, kajanje za počinjeno krivično djelo, njegovu porodičnost, te da optuženi ranije nije kažnjavao za ista krivična djela. Branilac optuženog, advokat Boriša Ilić, složio se sa svim navodima tužioca, predložio da Sud prihvati krivičnopravnu sankciju koja je propisana u sporazumu o priznanju krivnje, te kao dokaze priložio: Rješenje Službe za boračko invalidsku zaštitu Općine Doboj Jug broj: 07-41-575/04 od 22.12.2004. godine, kojim je optuženom priznato svojstvo ratnog vojnog invalida VIII grupe sa 40% vojnog invaliditeta, Uvjerenje Službe za zapošljavanje Zeničko-Dobojskog Kantona broj: 06-13-1209 od 01.12.2008. godine, da je optuženi prijavljen kod Biro-a kao privremeno nezaposleno lice, Izvode iz matične knjige rođenih Zeničko-Dobojskog Kantona broj: 03-13.1-9774/08, broj: 03-13.1-9773/08 i broj: 03-13.1-9775/08 od 01.12.2008. godine, broj: 03-13.1-6581/08 od 24.09.2007. godine, te broj: 03-13.1-6092/07 od 24.09.2007. godine, iz kojih Izvoda broj: 03-13.1-9774/08 od 01.12.2008. godine, broj: 03-13.1-9773/08 od 01.12.2008. godine i broj: 03-13.1-6581/08 od 24.09.2008. godine, proizilazi da je optuženi Damir Hadžikadunić otac troje malodobne djece, Uvjerenja Osnovne škole "Abdulvehab Ilhamija" Kalošević broj: 817/08 i broj: 816/08 od 01.12.2008. godine, koja potvrđuju da Hadžikadunić Adela i Hadžikadunić Belma pohađaju peti odnosno sedmi razred navedene osnovne škole, a u školskoj 2008/09 godini, te Uvjerenje Općine Doboj Jug broj: 05-13-04-316/05 od 24.05.2005. godine kojim se potvrđuje da je optuženi državljanin Bosne i Hercegovine.

Nakon provedenog vijećanja i glasanja, Sud je sporazum o priznanju krivnje u cijelosti prihvatio, nalazeći da su ispunjeni svi uslovi iz člana 231. stav 6. ZKP BiH.

Cijeneći dokaze koji su od strane Tužilaštva BiH dostavljeni uz optužnicu, i to: Dijagram koji označava transkripte razgovora osumnjičenog Damira Hadžikadunića sa licima Knežević Dragoslavom, Spahić Ahmetom i Sejdić Ekremom za period od 07.12.2007. do 17.12.2007. godine, Sedam CD-ova na kojima se nalaze snimljeni razgovori Kazimira Ivančevića, Pere Topića, Damira Hadžikadunića, sa pisanim

ispisom popisa razgovora za telefon koji je koristilo lice Kazimir Ivančević broj: 35397301803298, telefon koji je koristilo lice Pero Topić broj: 35699001633771, telefon koji je koristio osumnjičeni Hadžikadunić Damir broj: 35837700497745 i broj: 922048245 i telefone koje je koristilo lice Pero Topić broj: 3589900740967, broj: 35837800037251 i broj: 356237008048 41, Transkripti razgovora za period od 07. do 17.12.2007. godine a koji se odnose na krivičnopravnu radnju opisanu u tačkama 5. i 6. optužnice, Dijagram transkripta razgovora osumnjičenog Damira Hadžikadunića sa licem Sejdić Ekremom za vremenski period od 11. do 19.12.2007. godine, Transkripte razgovora za period od 11. do 19.12.2007. godine, Usmenu naredbu za pretres i privremeno oduzimanje predmeta Ministarstva sigurnosti Granične policije br. 18-08-2-KU-9/08 od 26.03.2008. godine, za pretres lica, prostorija i putničkog motornog vozila koje koristi osumnjičeni Hadžikadunić Damir, Zapisnik o pretresu osumnjičenog Hadžikadunić Damira sačinjen od strane Ministarstva sigurnosti Granične policije br. 18-08-2-04-329/08 od 26.03.2008. godine, Zapisnik o pretresanju porodične kuće vlasništvo Hadžikadunić Smaila u kojoj je nastanjen osumnjičeni Hadžikadunić Damir sačinjen od strane Ministarstva sigurnosti Granične policije br. 18-08-2-04-329/08 od 26.03.2008. godine, Potvrdu o privremeno oduzetim predmetima na ime osumnjičenog Hadžikadunić Damira, Ministarstva sigurnosti Granične policije br. 18-08-2-04-23/08, Popratni dokument uz daktiloskopski karton na ime osumnjičenog Hadžikadunić Damira br. KU 09/08 od 26.03.2008. godine, Zapisnik o prepoznavanju Ministarstva sigurnosti Granična policija br. 18-08-2-04-329/08 od 08.05.2008. godine iz kojeg proizilazi da je svjedok Mahmutović Jasmin prepoznao osumnjičenog Hadžikadunić Damira sa popratnom fotodokumentacijom, Foto dokumentacija Ministarstva sigurnosti – Granične policije od 26.03.2008. godine na ime osumnjičenog Hadžikadunić Damira, Zapisnik o saslušanju svjedoka Mahmutović Jasmina br. KT-158/08 od 08.05.2008. godine, Zapisnik o saslušanju osumnjičenog Hadžikadunić Damira od 27.03.2008. godine,

Sud je utvrdio da ovi dokazi u cijelosti potvrđuju krivnju optuženog. Zaključak da je optuženi počinio krivična djela koja mu se stavljaju na teret, posebno proizilazi iz transkripata razgovora optuženog Damira Hadžikadunića sa jednom izvjesnom osobom, te licima Knežević Dragoslavom, Spahić Ahmetom, Sejdić Ekremom, Kazimirom Ivančičevićem i Perom Topićem, a koji transkripti su potkrijepljeni ostalom materijalnom dokumentacijom odnosno snimcima sa CD-ova, iz kojih jasno proizilazi da je osumnjičeni Damir Hadžikadunić zajedno sa još dvije izvjesne osobe, te licem po imenu Hasib i licima po imenu Kazimir i Pero, državljani R. Hrvatske, organizovano vršio prebacivanje ljudi iz Albanije, Srbije, preko Bosne i Hercegovine, Hrvatske i Slovenije dalje za zemlje EU, a sve radi koristoljublja, tačnije radi pribavljanja protivpravne imovinske koristi. Pored toga, Tužilaštvo je tokom pretresa saslušalo i svjedoka Jasmina Mahmutovića, koji je potvrdio da je optuženi bio uključen u organizovano prebacivanje stranih imigranata i na detaljan način opisao na koji način su te osobe prebacivane iz Republike Hrvatske prema Republici Sloveniji.

Dana 15.12.2008. godine, nakon izjašnjenja optuženog, njegovog branioca i tužioca, Sud je, uz primjenu odredaba člana 49., člana 51. stav 2. i člana 250. stav 5. KZ BiH u vezi sa članom 58. i članom 59. stav 1., 2., 3. i 4. KZ BiH, optuženom izrekao uslovnu osudu kojom mu je utvrđena kazna zatvora u trajanju od 2 (dvije) godine, a koja kazna se neće izvršiti ukoliko optuženi u roku od 5 (pet) godina od dana pravosnažnosti presude ne počini novo krivično djelo. Sud smatra da je izrečena krivičnopravna sankcija srazmjerna težini počinjenog krivičnog djela i stepenu krivične odgovornosti optuženog. Sud dalje nalazi da će se istom ostvariti svrha krivičnopravnih sankcija iz člana 6. KZ BiH kako prema optuženom, tako i prema ostalim potencijalnim učiniocima krivičnih djela.


Odlučujući o kazni, Sud je na strani optuženog kao olakšavajuće okolnosti posebno cijenio priznanje izvršenja krivičnog djela kroz sklapanje sporazuma o priznanju krivnje, te njegovu porodičnost odnosno činjenicu da je, bar prema materijalnoj dokumentaciji koja je priložena u spis od strane branioca, optuženi otac troje malodobne djece, koje sve okolnosti je Sud cijenio kao osobito olakšavajuće.

U skladu sa odredbama člana 110. u vezi sa članom 111. KZ BiH i članom 394. ZKP BiH, od optuženog se oduzima imovinska korist pribavljena krivičnim djelom, i to iznos od 2.000,00 KM, koju je Sud na osnovu člana 394. ZKP BiH utvrdio po slobodnoj ocjeni, a koja sredstva je optuženi dužan platiti u roku od 15 dana od dana pravosnažnosti presude.

Na osnovu člana 56. KZ BiH, optuženom se, u slučaju opoziva uslovne osude, u utvrđenu kaznu zatvora u trajanju od 2 (dvije) godine ima uračunati vrijeme provedeno u pritvoru, počev od dana 26.03.2008. godine do 13.06.2008. godine.

Sud je na osnovu člana 188. stav 1. u vezi sa članom 186. stav 2. ZKP BiH, optuženog Damira Hadžikadunića obavezao na plaćanje troškova krivičnog postupka čiju će visinu Sud odrediti posebnim rješenjem nakon pribavljanja potrebnih podataka.

Zapisničar
Denis Podžić



POUKA O PRAVNOM LIJEKU: Protiv ove presude dozvoljena je žalba Apelacionom vijeću Suda u roku od 15 (petnaest) dana od dana primitka iste. Obzirom da je presuda donesena na osnovu sporazuma o priznanju krivnje, žalba na krivičnopravnu sankciju nije dozvoljena.